

四庫全書

史部

欽定四庫全書

史部

江南通志卷一百九十五

詳校官給事中臣丁雲錦
檢討臣德生覆勘

總校官編修臣王燕緒

校對官庶吉士臣吳裕德

謄錄監生臣徐瑞

欽定四庫全書

江南通志卷一百九十五

雜類志

志為史之一體今以表與傳入志所謂各從其類以類聚也其為九志所不能入而通志所不可棄者天時之一機一祥人事之一言一行古書之一信一疑繫於江南者不能更僕數矣網羅散失參伍而鉤稽之其詳備尚難焉若片羽

碎金之可珍則識者所不廢也易有雜傳禮有
雜記而史亦有雜家竊取其名漫羨而無歸者
歸焉為類四為卷六作雜類志第十

紀聞一

江寧府

倪文毅岳家鐵作坊任南大司馬每往部必步出
街口登車曰鄉黨父兄宗族所在豈得居然自尊
又嘗曰吾輩兒童時能讀書作對鄰里親姻俱喜

忽而入學補廩又喜中舉人進士又皆喜及其為官居鄉刻薄此心何安且廩膳科舉入京諸費孰非鄉里脂膏一旦得志圖報不得何敢妄作威福乎

王襄敏以旅家於聚寶門小市口之西屋宇樸隘為都憲時每過家必引避小市口路曰此皆我鄰居父老為貿易者我不忍以車前八騶妨其務也鄰有老人與封翁善王幼以伯父呼之既貴猶不

改後有勸其郊居不便請市羊市橋大宅者王曰
門廳高大必常得青衣數人守之吾一老書生安
能辦此矧兒輩耶

雨花臺東梅將軍廟祀晉豫章內史梅贊也舊志
謂贊嘗屯營此地按漢武時古文尚書出孔子壁
皆蝌蚪書孔子十一世孫安國定為五十八篇并
序一篇為五十九篇獻之遭巫蠱事未列於學宮
皇甫謐以授鄭冲冲授蘇愉愉授梁柳柳授臧曹

曹授贊贊於元帝時奏上其書亡舜典一篇至齊
建武中姚方興得之隋開皇中募遺典始獲全而
夏侯歐陽所傳皆廢贊之有功於書如此世人第
知為梅將軍不知有傳古文尚書事

陸慧曉家於汝南灣當秦淮曲折處張融自稱天
池逸民牽船住岸與之為鄰劉璡謂人曰吾聞張
融與陸慧曉并宅其水必有異味酌而飲之曰飲
此則鄙吝之萌盡矣

明祖實錄上以海內太平恩欲與民偕樂乃命工部作十樓於江東諸門之外令民設酒肆以接四方賓旅既又增作五樓至洪武二十七年八月成賜百官鈔宴於醉仙樓

金潤與王浚俱以高年居林下相友善潤子紳躋南少司寇謁浚向執猶子禮甚恭至是浚延之上座紳不辭而坐浚不悅別後移書於潤具道其事潤切責紳云吾止此老友以爾傲慢致絕何以為

情乃移書謝之浚不納潤率紳往謝三返而後得見自是欵洽如故前輩風度如此

童軒性寡合不妄取予雖貴家人衣食不給王恕為巡撫有所饋亦不受毘陵王璵知其介不敢致饋值有持禮幣求文者因謂曰童尚書文勝予可往求之至則童問曰汝自來乎抑有使之者乎其人以王尚書對遂却而不納

金澤為都憲能知人王以旂在諸生中澤即器重

之贈以所服金帶曰子異日名位當似我也後以
旂為尚書如其言顧璘撫楚時張居正年甫十三
有雋才璘大為賞器解所服金帶贈之曰子異日
何但繫此帶聊以見予期子意耳出少子峻與結
世好後居正在政府感璘知已議與祭葬官峻為
上林苑監事李重官於浙海鹽鄭曉為諸生重許
為國士曰子必得元鄉試果第一赴公車往辭重
曰此行仍當第一若第二人弗予見也已舉第二

迨歸逡巡不敢見三君知人畧相似云

江寧貢士盛仲交時泰高才博學既困場屋將老矣居常仰屋而嘆妻沈曰君見里中得意人乎不過治第舍買膏腴榮耀閭里耳以妾觀之有三殆焉屈志徇人一也踰憲黷貨二也生子不肖之心三也孰與君家居著書之為高乎隱處山中以免三殆奈何長嘆盛笑曰爾能是吾今可為大城山樵矣

周吉甫有山中白雲一卷中多見道語如云世事
惟偶然者最佳偶有醇醪適知心聚首偶有餘錢
適書畫來售偶欲登涉適伴侣相約真乃快意事
又云向平謂富不如貧貴不如賤此語尚有計較
未能脫然於富貴貧賤之外又云對明月照止水
便懷澄慮世間無心之物能使人亦無心也誦之
使人冷然顧起元曰南都自盛仲交後推此君為
隱士之傑矣

王允恭為和陽教官督學熊廷弼索劣生允恭力
言其無能固索允恭自銀鑄以見遂免時稱有守
劉尚書麟廣洋衛千戶蒼子也鄉舉時魏國公讌
之二鼓歸蒼不容相見麟與家人莫測其故求師
趙先生問之曰子得舉佳事乃不與相見又不言
其故彼何從知而改之蒼曰我是本府站廳千戶
麟纔一舉遂爾縱飲耶趙乃引麟相見請罪

海瑞為南右都御史一日因送表向三山門內一

孝廉家借坐孝廉家極壯麗憚海清嚴盡撤廳事
什物列舊敝椅待之有楊綰令人減驕撤樂之風
瑞所至人必擁輿聚觀婦孺咸歡呼歌舞即司馬
溫公之入洛不過是也其初來蒞任止攜二竹笥
舟泊上河人猶不知嘗延醫入見室中所御衾幘
皆白布蕭然如寒生也

卜璠生平好施德嘗卜地牛首山側見負戴者苦
渴即以資穿井今鐵心橋井是也偶經一橋聞下

哭聲甚哀詢之則夫婦逼於債攜幼子欲自盡也
捐金救之後過吳江夜深舟覆附船底漂數十里
得登岸叩戶求濟啓視則昔之橋下人也遂得具
食燎衣易舟以行

劉誥家復成倉前糧軍支所餘月米發之得官餳
十錠謹候其處翌日有銀鑄號而至者遺鑄糧弁
也主者已逮治之矣誥還之事乃白誥故貧聞者
多之

李時勉正統中為祭酒大師英國公張輔及侯伯二十餘人早朝畢奏曰臣等皆武夫不諳經典願賜一日假詣國子監聽講上命以三月三日往是日太師率諸侯伯到監始攜茶湯果餅之屬甚豐李祭酒命諸生立講五經各一章講罷設饌諸侯伯讓曰教授之地皆就列坐惟太師與祭酒抗禮久之太師屢辭祭酒曰秀才家飯不易措置願太師少寬命諸生歌鹿鳴之詩賓主雍雍抵暮而散

此真太平盛事也

梁尚書材為廣東左轄旦夕皆飯堂上侑以青菜
或冬瓜蘿蔔惟一味比擢副都御史巡撫江右薦
紳皆餞諸大觀橋解衣盡歡痛飲大嚼視所服圓
領用浙蕉極下者衷服布素澣補惟兩裾鮮潔始
知其節嗇乃習慣成自然爾罷官後門庭蕭然如
寒士同時管簡校子山亦罷官歸同在武定橋南
北相向而居子山造樓居廣田產會親友其門如

市人稱之曰管尚書梁簡校

丁清惠賓官南司空時盡心民事每五日一評薪
米之價市儈不得輒擅低昂榻前特設一析語門
卒曰遇有以便宜告者許非時得聞外每傳鼓榻
前即擊柝應之雖熟睡時不禁城中河渠皆賓所
疏濬者

王三原恕為都御史時巡撫南畿一日至市無賴
子乘醉面詈之王略無怒色徐曰此人醉矣命吏

卒遣之

劉清惠麟知紹興甫五十日政聲大和越人肖其像為小劉祠既為工部尚書心慕樓居無力築之文內翰徵明為寫層樓圖以遺之嘗張之於壁命曰神樓楊升庵為作神樓曲今此畫價值百金殆真樓弗若矣

劉清惠請老家居遇直指使者來頗以飲食苛求屬吏稍不精腆輒被誚讓郡縣患之清惠曰此人

吾門生會當開諭之俟其來謁因歎之曰欲設席
相邀恐有公務廢閣不如今日留此一飯但老妻
他往無人治具能從家常飯對食乎直指以師命
不敢辭唯唯就坐則又故延緩之自朝過日午饑
甚比就案設食惟脫粟一盂菽乳一器而已少頃
佳餚美醞羅列盈前直指不復能下箸公強之對
曰適已飽甚茲不能也公笑曰此可見飲饌原無
精粗饑時易為食飽時難為味時使然耳直指喻

其言遂絕不敢以盤餐責人

劉司空璽以江西運糧把總擢江西都指揮使巡撫盛應期知其廉明每屬以疑獄多所平反一日某御史按部南昌謁文廟諸生進講中庸至白刃可蹈中庸不可能御史問若鄉人先輩誰可當此諸生對以文公天祥璽在座聞之縮項曰奈何以專聶之行加諸仁至義盡之賢乎且仁至義盡之外豈更有所謂中庸耶諸生歎服而退

謝與槐督學廣西喜臨桂儒童張鳴鳳文筆竒古
因進而訓之曰子不患不成名患胸中無全書耳
乃取兩漢書親為之句讀令五日進院一背雖出
巡亦攜之行逮與槐轉官兩漢書已卒業矣其造
就後學如此鳴鳳字羽王後來南都拜於墓下立
碑而去

參議蔣法少治顧侍郎起元之外祖也顧云公少
為諸生所居在下街口門有樓二間即公讀書處

也後罷官歸猶讀書其上杜門埽軌人罕覲其面
有通鑑綱目一部每閱一過即以一色筆誌之凡
數閱五色皆備所批字畫精謹深可寶玩此不惟
見前輩擦履清貞矯矯人外即其終身學古無他
嗜好亦當時醇樸寡欲之一端也沈韓峯侍御看
綱目亦用五色筆前輩讀書用意大都爾爾今人
鹵莽言之令人慨歎深

顧文莊起元博覽羣書能文章兄弟四人一進士

官光祿一舉人官主事每元旦拜家廟畢長幼團集酒一壺上席列坐者凡三四行亦飲而不酬子弟皆空杯而已起元發言必朝章家政惟光祿唯唯主事以下皆不敢出聲此風士大夫家安可復覩也

朱侍郎之蕃和易長者父衣與焦弱侯同鄉舉焦重學識之士頗輕蕃每見即遭譏讓然蕃終身父執事之惟謹蕃官南侍郎歷綰五部尚書印每乘

輿回西及倉巷口東及橋即下輿徒步至家鄰有
婚喪雖細民之家必親至延之飲亦往與里人噱
笑無異寒素

程閣老國祥家甚微以菽乳為業幼時治骨角每
日入市夜則讀書與賈戶部必選同學有一札今
在賈孫爾安處蓋鄉舉日招賈飲酒者扎云足下
母以不售為恨某寒微之家驟發不祥反用為懼
其器度如此遠到非偶然也

國祥為戶部尚書日賈必選為司務論事偶不合
侍郎司屬皆在前賈厲聲曰吾與我旋三十年筆
研交而末路變節可乎我旋國祥字司廳當衆呼
之祥不以為忤

李如真與朱侍郎元价皆世居倉巷朱後輩既貴
達李但以朱大哥呼之朱未嘗不疾應李名登字
士龍耿天台弟子由明經為新野令所居屋後名
月牙巷垣內一小樓時有雙藤倚門蓋留都士大

夫多造訪者其地有封崇寺已毀如真鸞字以復之

雲浦盛時泰字仲交高才博學有聲文場既屢失意將老矣居常仰屋而歎其妻沈氏曰君見里中得意人乎不過治第含貲膏腴榮耀閭里爾以妾觀之有三殆焉屈志徇人一也踰憲黷貨二也生子不肖之心三也孰與君家居著書之為高乎從君隱處山中可免三殆之憂奈何長歎哉仲交笑

而諾之

陳廷尉士芳以選貢官吏部時頗著風采嘗語子弟曰聖賢千言萬語不離謹慎二字要須時時檢點又曰讀書講學當思實落用處何在若但付之空言為取利祿計即辜負不淺

石城門外居民哈九開飯肆有攜五十金赴江浦縣完糧者遺銀肆中哈九追及江邊還之其人至江浦見大風覆舟人俱溺死念銀失復得願以救

人遂呼舟救溺許酬以銀比救一人問之即哈九
子順治五年事

句容孫炎字伯融明祖命招致劉伯溫基堅不
肯出以寶劍遺炎炎作詩以為劍當獻天子封還
之基無以答遂逡巡就見

康熙間溧水司徒珍為濟陽令有村民某與鄰陳
獨者約侶貿易至暮而陳來叩門呼其子問何以
失約予以父晨出告明日陳又來率其子覓父至

他村見某已被殺古墓旁遂偕其子訟於令司徒
問父出門何所挾曰挾八百錢又問陳叩門作何
語偕汝覓父作何狀得尸在何地具以告則曰八
百錢乃致命之由也叩門倉猝間呼子不呼父已
知門內主人死矣且父既不與偕行陳何以獨知
其處約與貿易者陳報信者陳偕子覓尸者陳得
尸訟官者陳其為陳獨所殺也何疑陳駭服闔邑
稱為神君云

六合縣令某因耿天臺定向講學行部至縣令曰
王陽明先生但言良知不言良能得無遺漏否耿
曰如予官名知縣不名能縣豈亦有所遺耶蓋此
知字未易承當如一縣窮簷蔀屋之下其艱苦疾
痛無不了然洞悉則撫循之者自不能已矣若茫
然未知縱幹當一二興利除害事祇為門面計為
思朝廷設知縣之意終屬曠官也

蘇州府

庾冰為吳國內史蘇峻反遣兵攻冰冰棄郡奔會稽峻購冰甚急吳鈴下卒引冰入船乃故艤船市渚去飲酒醉還舞櫂向船曰何處覓庾內史此中便是冰大惶怖不敢動兵見船小謂卒狂醉都不復疑因送過浙江寄山陰魏家得免事平冰報卒恩問所願卒曰出自廝下不願名器少苦執鞭恒患未得快飲酒使有酒畢餘年足矣冰為起大舍市奴婢使門內有百斛酒終其身

張率在新安遣家僮載米三千斛還吳耗失大半
率問其故答曰雀鼠耗也率笑曰壯哉雀鼠不復
研問

張緒口不言利有財輒散之清言端坐或竟日不
食門生見緒饑為之辦食

張充少不拘檢肆意畋遊父緒請假還吳始入西
郭值充正獵左手臂鷹右手牽犬遙望見緒乃放
鷹繼犬向舟而拜緒曰一身兩役無乃勞乎充跪

對曰充聞三十而立今二十九矣請至來歲終身折節緒曰若過而能改乃顏子矣明年幡然易操尋師就學博覽古籍鬱為名士

袁洵弟子粲幼名愍孫好學有清才隨洵在吳郡擁敝裘讀書足不踰戶其從兄顥出遊要愍孫愍孫輒稱疾不動或有欲與洵子婚者洵曰覬不堪正可與愍孫婚耳

陸象先在官務以寬仁為政司馬韋抱直嘗言望

明公稍行杖罰以立威名不然恐下人怠廢象先
曰為政者理則得矣何必嚴刑樹威損人益已以
傷仁恕之道

范忠宣純仁罷相與程伊川頤相見責以某事合
言何為不言如是數四純仁但稱謝他日頤偶見
純仁劄子一箇凡頤所力言者皆已先言之矣但
不與頤辯一詞惟謝罪耳

范純仁嘗誡子弟曰人雖至愚責人則明雖有聰

明恕己則昏苟能以責人之心責己恕己之心恕人不患不至聖賢地位又曰六經聖人之事也知一字則行一字又曰惟儉可以助廉惟恕可以成德

范正平勤苦學問操履甚於貧儒純仁當國時與外氏子弟結課於覺林寺去城二十里正平徒步往來人不知為丞相子

蔣侍郎堂慶歷間由宜興徙居蘇州告歸後郡守

李仲偃即其居第建坊曰難老以祝之蔣愀然謂
胡文恭宿曰此俚俗歆羨內不足而誇之人者也
必撤去胡因其第有芝草之瑞乃改為靈芝坊退
語人曰識必因德而後達蔣公之德蓋人所畏故
其識如是非我所及

鄭希尹景平居帶城橋為人剛正不詭隨守鄱陽
未半載拂衣歸人問之曰奉天子命為守職當撫
字乃不得行其志今日須金幾百明日須金幾千

枯骨頭上打不出也時朱勔用事勢可炙手士大夫中惟鄭無阿附意

五經博士陳嗣初繼母吳夫人守節撫孤嘗以二語訓繼曰懋於學則道明安於欲則心晦此至理名言粹然相勗於聖賢也

盧仲甫秉父光祿卿名草自德清徙吳遂為吳人秉少有俊譽嘗謁蔣侍郎堂坐池亭蔣曰亭沼粗適恨林木未就耳秉曰亭沼如爵位時來或有之

林木非培植不成似士大夫立名節也蔣深味其言

李撰教授真定時曾布為鎮曾妻邀李母妻燕集武官提刑宋者妻亦預席盛飾而至珠翠耀目李姑婦所服浣濯布素而已又各攜其子俱來宋之子眉目如畫衣裝華煥李之子樸陋而弦誦如流曾妻曰教授今雖貧諸郎皆令器他時未易量提刑之子雖楚楚趨走才耳後李五子俱登科彌遜

彌大尤著宋之子止閣門祇候果如所言

王鑑真定安平人耿介厲名節父官平江路吳縣尹鑑侍養終任樂其風土遂隱居吳中臨頓里足跡不出戶者二十年應門惟一婢客至輒叩鄰家貰酒對客劇飲家貧無儋石之儲然非其義一毫不苟取性嗜蟹人或饋兩蒲青願易一詩曰我豈以口腹害物命耶盡放之江中而償以詩

沈右字仲說年四十未有子其妻為置一妾姿色

美麗右詢其父祖名女泣對曰妾范復初之女也
父喪家貧老母見鬻於此右惻然淚下因語其妻
曰此女之父吳中名士亦吾故人豈忍以為妾當
如已子視之即召其母令擇婿具奩遣送郡人稱
之

至正間朝遣兵部員賈空名告身過江南募民納
粟補官自五品至九品粟有差而民無一願者松
江知府崔思誠集屬縣豪右大姓列庭下不問有

無輒施榜掠衆皆悲涕入粟且逼抑使就官惟平
江監郡六十不為使者所惕力爭其不可闔郡得
免崔聞之大慚

金壇張德常起家吳縣丞歷縣尹遷嘉定州同知
其行也諸文士分賦吳中舊蹟送之廣陵成廷珪
得龍門廬山陳汝秩得采香逕宛丘陳秀民得靈
巖吳郡鄭元得越公井錢塘范致大得石湖江陰
張端得林屋館青丘劉墮得虎丘太原王逢得劍

池薊丘聶鏞得天平山四明陳樸得白雲泉會稽
張憲得吳王井四明陳涇得太湖石勺吳周砥得
洞庭山晉陵張體得琴臺巴西鄧德基得玩花池
清河張端義得錦帆涇崑山盧熊得館娃宮吳郡
王行得放鶴亭渤海高啓得響屨廊高郵龔宜得
梧桐園吳郡黃本得白公檜延陵徐文舉得百花
洲江陰張瑄得采蓮涇海昌董翔鳳得辟疆園無
錫顧常得夫椒山而遂昌鄭元祐亦賦采香逕且

為之序

楊文貞士奇薦士蘇州有三人尚書楊翥都御史吳納五經博士陳繼翥與楊在武昌固患難之交訥黑窯匠以一文繼教書儒生以一詩皆入啓事悉列顯秩為名臣

況鍾守蘇州興學禮士鄒亮獻詩鍾賞之將薦於朝有以匿名書數亮過失潛揭於府治門況得書嘆曰彼欲阻我薦正速成亮名耳遂薦其才學可

用召試授吏刑二部司務轉監察御史

吳縣尤安禮字文度官至貴州叅議歸田後人罕見其面況太守鍾入覲楊東里士奇詢其起居鍾無以應士奇曰公為守土吏乃不識尤文度耶鍾歸訪之見一老絡絲巷中布衣紩履環堵蕭然鍾欲割官地益宅謝不可遺以金亦不受鄉人傳為

美譚

吳訥居家嚴肅孫淳以御史按某處便道歸省怒

曰簡書之謂何杖三十遣之外孫錢昕登第來謁
命執糞之禮加弔箕上無塵長者嘗宴郡守命淳
行酒昕執炙拱立左右守跼蹐求同席乃令各攜
一杌坐廡下起侍酒炙禮如初後淳卒於官民奉
為神牲楮日甚訥令人持文一通告彼城隍神俾
驅還無為厲一夕里巷聞車馬聲僉曰御史歸矣
太監牟良知書好禮正統間織造蘇州有人以刻
絲獻者良曰此內府所未曾有也今以上聞必為

民病因却其所獻

趙煥之庾幼撫於從伯中丞士諤方有母喪衣麻
衣值歲時兄弟皆綵服庾獨匿不肯易服中丞甚
器重之一日與仲兄奕中丞呼庾至詣且撻之而
薄責已子庾不解中丞曰汝父母相繼歿貧困非
力學何以自樹且汝賦資敏勉加奮厲無慮不達
我予才不汝逮蒙業而安耳汝何自比於彼暴棄
若此庾由是感激向學卒以成名每為人述此事

輒涕洟不止

韓雍家居或以韓世忠像遺之曰公之先也韓取懸中堂焚香再拜而返之曰韓雍出自寒微人所共見豈敢妄祖蘄王

陳興立居長洲之蠡口奉母至孝母嗜楊涇橋糕離家十餘里興立不避風雨寒暑每日致之如是者將十年忽一日途遇破衲道人求糕即與咱之復往買歸而道人已昇前糕與母且留一瓢云將

此注水飲人可以療病自是病者日求瓢水飲之疾良已一時以為孝感遂聞於朝明孝宗遣中使取瓢以去興立歿里人為立祠

上元史忠字端本自號癡翁工畫山水人物嘗訪沈啓南周於吳門不值見堂中幙有素絹搖筆作山水不題姓名而去啓南歸見之曰吳中無此人必金陵史癡也邀之回留三月乃返晚無嗣一女既笄婿貧不能娶與婿期元夜畧具隻雞斗酒我

當過飲至夜誑其妻女云家家走橋觀燈盍亦隨俗可乎攜其妻女送至婿家留其女一笑而別

都穆字元敬居吳之南濠以太僕少卿致仕家居讀書不輟嘗有娶婦者夜大風雨滅燭徧乞火無應者衆雜然曰都少卿家當有讀書燈在叩其門果得火齋居乏食笑曰天壤間當不令都生餓死徐恪為御史一大守送厯日百本有金葉一片共約千金恪將厯封固後按其地命太守領厯去亦

不言及

申文定時行在政府日秀水朱太傅國祚見時行於邸第時方九齡時行特起避席留之讀書一日從師出遊國祚失足蹈汙泥時行命僮子回取履僮子誤持時行朝鞶至國祚不敢納時行笑曰履之終當踐我迹耳及舉順天鄉試同學少年有侮之者時行拂然曰是且大魁天下若輩焉知明年

國祚果臚傳第一

陳珍凡國華萬歷甲戌進士歷刑部郎中廣州知府歸年至九十及見後甲戌進士同縣嚴栻登第國華戲投以同年刺枉顧之時傳為美談

懷宗時巡按御史祁彪佳於月朔特行賞善罰惡之典前三日遍約郡之士大夫集圓妙觀又諭閭鄰父老畢至乃舉善人某某花紅給賞囚惡人某某將杖殺之以詢士大夫皆曰可又以詢諸父老亦皆曰可遂杖殺之遠近悅服

崑山周壽誼年一百一十四歲魏觀守蘇州舉為鄉飲賓是生於宋者也

成弘間崑山士大夫有弔會月輪一人主之祭王文恭絢王侍御葆李樂菴衡劉改之過易蓮峰斗元顧尚書禮龔安節詣諸無嗣者之墓後楊循吉之墓在郡城濠南詹事姚希孟祖墓近焉姚展祖墓必啐酒楊墓歲以為常

崑山顧夢圭字武祥當參議粵藩賦詩云夏月行

部至雷州思製一葛且復休冬月行部至廉州思
製一裘且復休故衣雖穿尚可補秋毫擾民民亦
苦呂仲木擷梅花贈之曰武祥如此花矣聞者以
為美譚

崑山許立知海豐縣每出行見一老父掃墓無間
使人問之曰吾父母生平畏蛇蝎今雖歿恐其潛
撓致體魄不安耳許獎其孝請與鄉飲以勵風俗
常熟東鄉有義鴿冢相傳一人謫戍其弟在家偶

持鴿入市見少年束裝因問何往曰伐兄戍耳遂
感泣曰吾兄在何地而不一顧耶不謀妻子竟帶
鴿往後傳家信悉賴此鴿鴿死葬焉

常熟趙氏祖傳纏喉風藥甚效而方極祕惜一日
趙氏子與友章某飲章詢其方不答酒次趙喉間
忽痛不可忍乃大聲曰為求猪牙兒角來來則搘
爛以酸醋調末入喉四五噉痰大吐痛立止章數
以告人傳者遂衆

譚曉居常熟之東里與兄照相友愛照持門戶而曉用圭頓術財至不貲曉無子病篤其女婿覬覦之曉不可乃以照之次子培為後曉死照念弟以辛勤起家已奄有之不義後培亦旋死適倭寇張甚而邑無城衆洶懼議築城以禦括公私帑僅充費十之五計無所出照躍然曰吾財有所以用之矣籍其藏得四萬金獻於官不日而工畢寇來不能入邑得全而照竟為貧人以老

吳江鱸鄉亭傍畫范蠡張翰陸龜蒙像謂之三高
至元間里人祠祀之張邁題壁云功迹盡高天下
士豈惟吳地作三高夜夢老人來云張陸吳產也
吳人固當祀之范蠡越產與勾踐陰謀十年卒以
滅吳吳之仇也吳人不當祀之子何為附會之乎
子之詩我不與也邁覺異其言志於祠壁

徐孝祥居吳江茆屋數楹而樹石幽勝有田數畝
供饘粥而已隱居好客客至必留飲歲常釀酒數

石而自奉布衣草屨泊如也一日後園徐步見樹根一穴坍陷諦視之下有石甃啓之皆銀也亟掩之人無知者幾三十年直至治壬戌歲大歉孝祥曰是物當出世耶乃啓其穴銀如故日取數錠收糴以散貧人所全活者不勝計銀盡乃已女適人惟荆布遺之而於穴中銀錙銖無犯其子純大以明經發解官至翰林供奉承旨孝祥封如其官壽

杜偉吳江人萬歷時仕工部郎學者尊為靜臺先生嘗曰有意為道德道德亦名利無心於名利名利皆道德

杜偉幼育於沈給諫漢仲之子嘉謨沈竒其穎悟廟見而子之後歸安茅鹿門坤作沈墓志直書偉杜姓偉致書茅欲芟去之茅答云萬物本乎天人本乎祖此必不當諱者太史公傳衛青至云青無本姓冒衛媼為衛古人於此等絕無含糊足下賢

者也一切文章行誼當與古人相應何必嚅嚅效世眼所爭耶茅此論甚正其引衛青事令人必不肯言偉亦不以為忤厥後仍復本姓蓋得乎茅之言也

崇禎末吳江大疫觸屍氣必死諸生王玉錫之師一家五人死無敢窺門者弗論棺殮也玉錫毅然直入曰師弟之謂何忍坐視耶至屍所一一棺殮之并抱所遺襁褓子出藥乳得生

松江府

咸平初趙屯漁婦張曾河上得一白龜如錢色玉
瑩電眸朱尾宮畫燦然放於河夜有光熒熒往視
之龜在焉乃獻於官郡守具表以聞張君房曰按
瑞應圖千歲龜巢蓮葉上其出也其將以應千歲
之運乎且白西方色也龜歸也豈西夷懷歸乎明
年朔方叛帥李繼遷貢馬

賈宣伯有神藥嘗過松江得巨魚置罟中因投少

刀圭藥魚引吸即死後吳江有怪土人謂蛟為孽
宣伯以數刀圭投潭中明日老蛟死浮於水而水
蟲莫知其數其藥云受之皂閣山王天師止熬黃
檗水以熱酒沃之別無他物

黃土橋周保宗敷文閣學士尹之後也年三十餘
未有子保性虔恭樂施夜夢神人授十八味藥方
既寤知即五積散曰是委予施濟人也遂造酒三
十石清藥以施酒盡則出其方俾人自清酒服雖

疾無弗愈者自是有男子五咸以為誠感獲報云
翰林學士高智耀河西人嘗奏崇學校正儒術者
戶籍免其徭松江學宮像而祠之知府張之翰為
之贊曰公生西夏遭際聖元力扶吾道名動中原
致位內相垂裕後昆德日益彰身日益尊畫像雲
間在泮之坤香火弗墜埃及昏百千年兮不亡
者存

宋末北橋俞彌恭與子端好施惠凡售物者自百

緝而下一聽所邀償之糴及百斛必悞唱籌以裨其不足人謂之癡

孫彬頑而美年三十無子嘵謂所親吾志得一官而有四子以英俊雄傑名天其可必乎人咸哂之已果育四子唯傑夭折餘至正間並位星郎彬亦貴如其志云

談公綽以老人受憲司命簡災田於松江夜宿華亭富人家富人欲虛冒災田數厚欵之寢密室夜

分一女子出榻後談驚叩之女曰父貸主人粟積利三十石因以妾質今夕奉主人命來也談遽起求出而門扃不可啓呼主人弗應乃諭女曰汝良家子吾安敢汚張燈待旦既主人入談曰某所負我當代償幸以女還其家主人慚謝遂焚券而還之

華亭市舖一物如桶而無底非木非竹亦非鐵石莫能名而用之者一日有海舶老商見之驚喜撫

弄不已叩所值其人亦黠駢漫索三百緝商酬以
三之二遂付之因叩曰某實不識此物今既賣無
悔理幸以告我商曰此至寶也名曰海井尋常航
海必須載淡水自隨今但以大器滿貯海水置此
井於中汲之則皆甘泉矣按范石湖集載海中大
魚腦有竅吸海水噴從竅出則皆淡疑海井即此
魚腦骨也

楊維貞避地松江嘗有一貴遊子既破產流落海

上數踵維貞門一日竟持所購倪瓈畫去左右欲
發之維貞曰吾哀其困使往見一達官以畫為介
耳非盜也

任勉之歿未葬里長編其子弘為本縣養馬夫教
授言於太守葉冕冕嘆曰有是乎即諭令歸治喪
大書榜於門曰今後均徭故官子孫一例優免
費榮敏案斛銘云出以是入以是子子孫孫永如
是案為名臣而克勤小物隨處可想見

洪武中數遣使者廉察諸仕宦家任勉之令鄱陽時使者至其第茅舍三間父灌園母紡績使者給以客遊至鄱有札寄子否父因貽書畧曰天道福善禍淫甚可畏也勿謂已安已治而懈怠勿謂已能已足而驕矜使者以書上達并陳所居狀太祖嘉嘆旌異之

劉鈍兄銑永樂間以會計事坐法繫京師獄鈍婚二日即趣裝北行護兄後兄思歸鈍陰乞守者代

兄繫兄歸給父母謂弟旅病卒既而里人官長安者為司寇白而釋之既歸家人驚以為鬼鈍具言其故與父母相對泣兄愧逸去後鈍生二子璵玉璵天順舉人仕至建寧太守玉生子袞仕汀洲通判袞子兆元舉進士懷慶推官

上海秦嘉楫初授行人使周藩周王偉其風度厚贐之秦悉謝却王乃衣以一狐裘曰天氣方寒幸使者為遠道計不得已諾之至杞縣托同年以裘

歸王曰某小臣何敢辱王服

張莊簡悅自律甚嚴而待物不苛有四川監司赴任請教張曰川行甚險州縣卑官攜妻孥往者實以軀命博升斗祿幸無以微罪斥去之

李觀察希顏居東郊洞涇上止茆屋三間其門人為御史行部來謁見其室陋曰何不稍擴之李曰無力辦此御史請任之李曰是即民脂民膏御史不敢復言

宋天民公望與顧文僖清同學友善及文僖主考
秋闈竟不入試顧深以失之為恨抵家始知其
故即造慰曰何自遠乃爾答曰我兩人交厚不得
則損公衡鑑得疑公私我故引避以兩全也顧大
嘆服

顧文僖清修松江府志黃憲副明致書云夫志者
所以識一方之事凡人物風俗政教賦稅之類無
不該載即古之一國史也前之修者間雜以私致

後之觀者不甚信服執事於是非筆削可不加意乎且執事行將入閣而操天下刑賞之大權於此亦小試耳謹拭目以俟毋使後人之視今猶今之視昔也

陸文裕深出入館閣前後幾四十年每抄錄國朝前輩事命子弟熟讀曰士君子有志用世非兼通今古何得言經濟今世學者亦有務為博洽問及朝廷典故一代之經制沿革恍如隔世縱才華邁

衆終為俗學

正統間富林焦震家生瑞竹凡二本皆異梢同幹
森然齊長越三四年又生一本亦如之震隱居教
授與弟友愛深至人以為和氣所鍾云巡撫周文
襄忱有詩咏之曰植物有修竹獨為貞靜姿況作
此嘉瑞一本挺兩歧間生已為異重見真絕竒考
祥揆所自天和本人為君家世積善習隱勤詩書
孝友既不爽德慶日以滋冲融感和氣徵應良在

茲繁陰媚駢幹密葉交連枝春妍色不競冰霜操
宣移虛心待結實擢秀期諸兒朝陽有彩鳳翩翩
將來儀

張鑒巡按山東過酒肆帘拂其冠墜地公徐命拾
冠著之諸長吏惶恐繫賣酒傭待戟門公諭曰自
後帘可高懸竟遣之去為大司寇時有獄須急報
夜坐趣吏治文書遲明早奏夜半書既就吏拂燭
汚文書叩頭請死公曰悞耳趣再書之坐待達曙

不寐

張弼為兵部郎數以直言忤當路遂出守南安入
觀至京謁李文正東陽間人辭焉弼題其几云始
知東閣先生貴不放南安太守叅東陽固賢者與
弼善弼非譏之也而風流亮直之概可想而知云其守
南安時各郡收兵議賞武夫吏卒惟願得其墨妙
故多以筆札佐郡費有方伯入觀緘楮一篋求書
以饋長安貴人弼笑曰吾不能為書傭也為書四

紙而還之其持正又如此

曹時中分巡黔中所過題咏郵壁及還復經其處
見有屬和者詞甚佳訪知為從行指揮所作既而
其人罪當褫職特釋之及歸其人饋五百金公曰
我惜汝才耳豈有私耶却不受家居廣富林不輕
入郡邑守令初至一通謁歸即杜門守令至亦不
接見年八十不復冠帶見客幅巾布袍賦詩飲酒

人樂其真率

華亭吳不顯初補學官弟子製青苧布為襯衫後
以授兄子太僕炯以及孫曾家有青苧亭至今存
焉襯衫之製諸生服之洪武二十四年三易其式
而後定用玉色絹布為之寬袖皂緣繫條垂繡其
後漸易以藍又罕用布者矣

潘奎為本郡掾慈仁好拯物太守御下嚴胥吏無
敢啓口有豪甚殘暴往往誣陷殺人賄諸役煅鍊
人無敢辨一日當審錄退奎伏地為諸囚白冤并

數豪不法事甚具守乃覆訊得實悉解放捕豪下
獄後奎於吏舍生子守夢諸神騎乘鼓吹送一兒
至吏舍醒而念曰有德者必有後是潘奎家也月
給粟周之所生子即尚書恩也

錢福里居日有老儒館梁溪鄒氏詭稱錢狀元師
以取重鄒與錢舊相識適報錢至河下鄒以錢來
必謁師大治具以待師惶窘無措謂主人曰我當
往舟中與偕來乃詣錢叩頭請死囁嚅吐實錢笑

曰是不難欣然同往侍坐盡醉而罷

瑁湖橋有賣餅師析箸爭父遺貲構訟兄以五十金乞顧文僖清居間求勝清佯應之使人召其弟叩所爭狀弟謂兄匿百金不予耳顧笑曰是易決何至遂傷天性即召兄至出金授弟曰我與若兄弟分此百金矣兩人感愧泣謝而去

馮恩有布衣交曰郭濟恩上疏逮詔獄惟濟與同起居索餧之饋五易寒暑及恩得諭戍而濟以勞

憊卒於旅次恩哭之慟撫其子女成立給以田宅遇之如家人子弟云

四義僧舍利塔在余山之北嘉靖間知府方廉所建皆征倭死事僧也

羣鶴旋飛俗謂鶴井鶴飛成井必有風雨若探巢攫其子則一方致旱嘉靖間松江大風拔木鶴巢墮地有子不損老人侯姓者取護之鶴復成巢負去其後侯老得疾氣絕矣鶴銜一草如箸置其口

復活或曰此東海祖州不死草也

嘉靖乙卯順天鄉試首題仁以為已任次題必得其名二句司禮巨璫持主考甚急宣言於朝曰仁以為已任下不知是何語徐文貞階曰即必得其名必得其壽

徐文貞階督學兩浙時有士子文用顏苦孔之卓語徐批杜撰後散卷士子曰此語出揚子法言徐遽出位揖之曰本道科名早未曾讀書今承教矣

衆皆嘆服

徐鴻洲三重有八語自識室中曰室無美姬堂無俊僕案無戲具門無雜賓又宅取安人田取給食書取明道器取適用

徐文貞階以禮部右侍郎遷吏部時榜於壁上曰咄汝階二十一而及第四十三而佐天官國恩厚矣何以稱塞所不竭忠殫勞而或植黨以擯賢或徇賄而鬻法或背公以行媚或持祿以自營神之

殛之及於子孫

張所茲思敬娶許氏外舅歿分授百金張曰此許氏物也立命還之從父給諫承憲有門生典試密寄關節一紙給諫子幼召思敬授之謝曰以此而得何以立縉紳間竟不受後司訓署邑篆歷以清介著早於一言徵節概矣

隆慶間張燭知華亭縣櫃吏餽羨金千餘循故例也張悉籍其數報於兩臺請補別稅額臺使旌之

曰塵視千金今猶額公署退食堂

海瑞為巡撫意在搏擊豪強而兵備蔡國熙承時
相風旨首發難於徐文貞階於是雲間刁風特熾
告訐無虛日或投柳跖告伯夷叔齊牒諷之海殊
自悔乃盡焚訟牒故老言此陸莊簡光祖戲筆也
蔡汝賢侍郎營墓墓父墓旁有人以積土來售畚
鍤將半土中微露磚榔蔡惻然亟移原土封之不

復取直

林景暘以太僕家居性惇恪而雅負倫鑒喜獎後進延文士與子有麟同學每舉會必晨起滌几席設楮墨客具必親閱三命題期以酉刻畢畢則引大觥酌客稱引古道相慰勉迄無倦容與其會者張宗伯鼐鄭憲副棟杜方伯喬林杜駕部士基姜中翰雲龍錢比部大忠及李紹文也

奚夢芝母病早夜籲天復收瘞遺齒為母祈福母夢神針兩頤及膝病遂瘥叔貧乏嗣養之迨卒稱

貸治喪姊密以筐篚寄芝皋卒籍而歸其子萬歷初司訓金壇遷曹縣教諭

徐文貞階嘉靖癸未探花及第壽八十一及見後癸未進士陸文定樹聲嘉靖辛丑會元壽九十七及見後辛丑進士姚方伯永濟萬歷戊戌登第壽九十八亦及見順治戊戌進士皆松之人瑞也
都侯許維新嘗坐早衙見興聖寺浮圖上有人盤旋使隸攝至具言為寺中磨治墻頂許熟視良久

問其姓名居址命鄰里具收管狀存案以其人趨
捷異常可慮也其防微周密如此又嘗開濬郡河
募工挑土擇無業荒灘積之故河旁無留土久而
通利其灘積高遂以葬無主之喪超果寺兩廊旅
櫬累百一旦盡空蓋治河難於運土此亦可為法
萬歷間府城有劫盜先數日有人載稻草灰堆積
東城下高卑大小不一處是夕羣盜劫城中自城
飛墮灰上安然而去有詰奸之責者不可纖瑕不

察也

李凌雲為御史日過滄州州守裁其夫馬李不為
忤後巡按福建而州守為汀州同知自以前嫌必
當被譴及李行部至旅見畢復召入謂曰屬吏皆
先容競進獨君無有已登啓事幸自勉竟首薦之
葉蕃春憲副有聲之父居黃浦東嘗宿邸舍主人
出追逸僕獨少婦在日且暮矣蕃春渡浦避之時
甚風雨足繭血濡無所顧又鄰有妾與嫡忤者胠

篋逃夜匿蕃春園蕃春密召其夫與俱歸曰無篋
楚使聞諸人為而垢其質行修飭如此

徐炯倜儻好施振人之急不能償者多出券還之
家居南橋嘗以事至郡所過津梁十餘處皆圯毀
不治歎曰風雨冰雪中病涉者多矣遂捐資悉創
石梁里人至今賴之又覽南橋形勢有明行寺居
南而北無鎖結因捨地建佛閣三座石甃洞門以
通往來與寺遙望為浦南名鎮焉年逾耄無疾而

終

杜啓勲內行甚飭家貧假錢貿布之大賈席同鄉
家市之司庫者於本值外誤發羨銀數十金勲不
知也歸始知乃復棹舟以餘金歸席又嘗拾遺金
於木市艤舟待亡金者歸之不告姓名而去

李存素玠瑩積學教授恒語學者曰狂得聖人之
神狷得聖人之骨惟鄉愿襲聖人之皮毛耳人推
為確論

張勃父年九十餘病不能起步明季土寇索財欲殺其父勃以身捍寃轉白刃間賊感其孝俱獲免小礮里民高英偶他出夜未歸羣盜窺高繼妻張及女慧俱二十許有姿遂夥至女聞之遽呼母起曰賊至矣寧鬪死毋為所污且命幼弟挑燈曰看我殺賊遂握刈草刀伏門左張持鋤伏門右一賊巨斧斬門入柄長礙戶落稍緩而女刀已斬賊頸墜一賊奮戟入張揮鋤擊之不中中楣堅不能脫

女為指壁間稻叉張遂引叉刺賊洞胸背一賊憤甚遽赤手入奪女刀賊手刃女手柄劃然柄刀為二賊雖得無柄刃而手傷甚不能用女則以柄搘之而張又拾地下賊斧亂劈賊退未逾限而斃當是時門外賊林立駭愕不敢入爭負屍逸去明日青村所守備楊廷棟往勘得狀且見賊頸兵卒咸咋舌

義田贍族自宋范文正公仲淹創行於吳中

負郭常稔

之田若干畝其規例見錢公輔記嗣是前明申文定時行
義莊田若干畝陳文莊仁錫田蕩三百畝又唐順之記無錫華
進士從龍近郭田若干畝皆倣文正公之意其他惜不盡
聞

國朝刑部尚書張照祖淇以田千畝贍族田在婁縣照具
以奏奉

旨張淇所置義田著照伊孫所請立冊存案張淇以已
田作為公產贍養宗黨其敦本厚族之誼可嘉應加

恩旌獎以昭義舉著交該部酌議具奏部覆張淇照
伊子彙吏部侍郎加四級職銜給與

封典仍行文署江撫喬世臣飭該縣立冊存案載入
縣志張氏子孫不得擅賣族人外人不得擅買違
者照例治罪奉

旨依議士大夫咸歎美之以為盛事

常州府

楊龜山時正和間寓毘陵居龜巢巷嘗謁鄒志完

時志完已病楊至臥內見之猶問以時事如何互
相咨嗟龜巢菴在今周仙菴口

張誠旌孝碑宋元豐七年毘陵華直內所重建誠
須城人自祖綰六世同居男女少長合一百十七
口以耕漁為業每日坐堂上集子弟分工授事皆
整容悚息而出不敢少怠南渡後徙居毘陵子孫
以文學取科第為毘陵望族是碑沒於郡人薛埜
之家園元至治間因治地得之植於庭

倪瓈自先世以來代雄於貲瓈厭棄紛華清修好
義其師翠昌王仁輔老而無嗣奉養終其身歿為
制服執喪營葬務致誠懇嘗鬻產得錢千百緡會
張雨至其家念雨老不再至推與不留一緡

無錫有義犬冢張籌遇毒蛇犬噬殺蛇中毒死籌
葬之勒石以志云洪武元年余以尚書禮部奔先
考喪歸講喪禮時則鄰姻得菴費翁數相過從六
月既望時雨新霽余因訪得菴於弓河草堂步行

新橋委巷泥濘沒屐齒余踞盤石濯足有蛇蟠石
交縛余左足事出不意時惟一黃犬隨余行余顧
犬太息犬解余意噬蛇數段死犬亦旋死余相河
南隅一丘用莞席四襲坎葬云嗚呼銜結之報書
傳所載非誣也乃余親受此犬脫非常之厄謹朱
書元石追而納之壙與得菴親臨視焉余乃一梧
主人姓張氏葬之為六月二十四日

徐晞永樂中由縣功曹歷陞兵部尚書其為功曹

時有貧人悞籍戌丁被攝祈免具酒為壽令妻進觴而身自引避妻殊色也晞一見絕裾走仍脫免之

尤文簡延之每公退則閉戶謝客日計手抄若干古書其子弟及諸女亦抄書嘗曰予所抄書將彙而目之以代饑之肉寒之裘寂處之朋友幽憂之金石琴瑟也

張通叅選大節甚著臨終語所親曰先輩身死國

事如施御史武許給事靈皆未與祀典吾累陳之
有司未之信也吾死勿置我鄉賢以增吾愧

湯大理沐公餘日錄云予仕武義時適奉部檄旌
表節婦朱氏先期召婦入邑蓋鄉民徐信妻守節
五十年矣用綵亭二一置金縷一置文牘題綵聯
云喜聞鼓吹喧通市羞殺琵琶過別船又云食茶
敢謂當年苦啖蔗方知此日甘又云地無塵土沾
荆布天有恩波載柏舟以竹兜坐婦導迎遍城市

許婦女縱觀仍偕儒官送至其家蓋奉宣德意固
臣職之大端表勵風俗尤親民之首務聊竭此心
而已

朱仲南為縣主刑吏景泰末無錫大饑民無食者
羣聚而之有穀之家強貸焉有穀之家指為盜上
之郡郡守擬以辟仲南爭之曰法當笞足矣守怒
其徇榜掠甚毒嚴訊至再無異辭獄以不成英宗
復辟諸囚邀赦出仲南曰我為小吏活三十六人

心亦可以無負矣遂解役歸

張養浩嘗行高橋之南遇醉而鬪者一人墜金於地張捨而默觀焉鬪已其人始覺大惶迫潛然出涕張徐呼謂曰男兒何不能自慎以有此失苟非我恐金不歸矣遂還之其人謀所以報不顧而去子愷舉成化進士

顧榮僖可學副使可久之祖少貧寄食於姻邵早起立門外富人鄒雲騎馬過一僕騎而負笥以從

下馬攜笥如溷既見主已遠遂馳去忘其笥顧視之一笥金也俟其來還之雲聞馳謝願分十一以贈不受時適有蘇商見而義之妻以女後乃日昌終邀封典

陳廣儒家子孤貧通家顏氏衣食之廣無能強飯酣卧而已且有風疾顏厚之不少衰顏之讐賄侍婢置毒餅中以進廣知不泄遽入攘餅食之左右方怪駭食頃嘔出細蟲無算問之終無所言及侍

婢夜逃人始漸知其事而廣風疾頓除壽至九十

八

顧言曾祖清年逾四十妻方娠適寒夜清宿郡邸
有女來奔清正襟出庭中冒寒立比旦托事歸而
是夜即生子至言貴顯

邵文莊寶幼與同邑丁松年惠遠稱三奇童嘗同
至洞虛宮嗣龍山房道士年八十餘謂曰聞三君
敏妙我有王學士壽先師祖文千餘言能誦十過

記當烹白鵝以進於是丁誦一過背之不失一字
惠誦兩過訛四五字邵細讀三過又聽二子背誦
各一過訛十餘字道士進鶩既去謂弟子曰邵子
深沉寡言舉止不苟此遠大之器二子質敏而氣
浮非其倫也又三年而丁以儒士第一人應舉不
第尋卒惠後仕終順天通判邵至大位悉如道士
言

萬宗伯士和唐荊川順之門人也分守饒州謁別

荆川荆川以磁孟二為贐或曰饒固多磁何贐是
唐曰惟其多磁是以贐也萬子他日歸而磁不加
益者乃真我弟子也

惠山之麓有碧山吟社成弘間諸名德為文會之
處好事者繪圖以紀其勝邵寶為之記

王宗幼喪父傭惠山僧舍及宗年十三慟哭迎
父歸止於外家旦暮負薪以養既二年拾遺囊於
道俟其人至而還之則報以三緡受而買二驢負

載取直父養稍裕又十年始僦屋三登里娶妻生子痛母早世終身不飲酒食肉當宗策蹇時為富民張江斷斂瀕死後江與強銘者訟久不相下會銘一奴死遂誣江殺之知宗之仇江也餽之金而引為証及就訊宗慷慨明其始末還所餽金於官修三登倉其子曰澤澤子台問問子鑑皆登第

許鼎臣之父繩武以屋典毛敬宇銀四十兩敬宇不戒於火屋燬繩武慰之曰典銀當奉還已而書

與鼎臣曰毛敬宇失火吾家當自再造耳鼎臣方為僉憲亦以銀寄歸曰應還其銀也父子同心好義與范文正詢堯夫麥舟事相類

鄒忠穎極孝一日將飯食肉而美問母曾飯未既而知先母飯也自咎罰穢水二碗終日不食又極友愛祖居一區得第後讓弟居之弟三鬻於人三贖以與弟居之

孝廉許世卿伯勲嘗揭安貧五戒於壁曰詭收田

糧干謁官府借女結婚多納僮僕向人乞覓又揭
省事五戒於壁曰無故拜客輕赴酒席妄薦館賓
替人稱貸濫與義會又有和風未學由由惠清節
寧希望望夷之句每勅其子曰人何可不學但口
不說欺心話身不做欺心事出無慚朋友入無慚
妻子方可名學人耳

白惠風貽清當會試五日父訃至或勸匿之白曰
今科不第尚有來科終天之悲如何可遏今違舍

殮罪已莫逭況可入闈以冀非分耶星夜馳歸後
服闋登第

宜興堵作邦妻徐氏少寡止一女亦早寡母問當
守故女以夫情對母作色曰婦人之節守義不守
情夫情與欲鄰念情即欲動欲幾動而守不遷者
寡矣女凜然受戒母女相依操如霜肅

趙登之熙瀛四十無子方與諸昆謀卜地葬親而
形家言地獨不利於熙瀛嗣續奈何熙瀛毅然曰

有諸猶子在趙氏鬼不餒但得親骨入土吾絕嗣甘心焉竟葬之後生子林玖登鄉薦孫枝繁衍

萬歷間島盜躡毘陵官兵懦縮顧湯卿率里中子弟為團練厲衆扼據河北諸村設伏山溪叢薄勦殺無算會夜逐北錯足墮水遂遇害官檄各處倣行顧保障法寇平為建祠曰義烈

江陰縣簿曹廷慧力捍危城四十日不寢食卒用火攻退倭論功陞蘇州判去有戰馬直百金曹以

官物留於縣上官知之命日給圉人料銀一錢豢
之二十餘年乃死

劉峯混跡牙儈襄陽估王姓載棉花至常因往浙
以銀二千餘兩并衣囊手書單貯峯處估去溺死
錢塘江峯聞之即馳信估子子至悉以前所貯及
單與之子感涕願分其半峯義不受自後子孫科

甲綿盛云

萬歷壬子鄉闈學臣命諸生在省候榜榜首武進

張瑋也。瑋師同邑高秉忠夙儒弟子，登榜者并瑋得十七人，例鹿鳴讌五魁坐堂上，餘列兩廡。瑋白監臨御史弟子不得先師移秉忠席堂上，其十七人者向秉忠肅拜而後就坐，一時以為盛事。

萬曆末商舟浮江來，艤黃田港，舟人死，藁葬城北隅，舟人故畜一犬，犬繞屍悲鳴呼之不去，商舟解維其犬，臥墓下，寒暑不暫離。居人哀之，咸給其食，且為草窟以庇焉。又博瀦里民家一犬，對宇而居。

者時與之食後其家主人死主婦即嫁對宇者大
遂絕不入其門與之食亦不食竟悲號臥死空室
中嗚呼人之愧此者多矣

天啓乙丑秋將毀東林書院高忠憲攀龍夜召儒
學吏潘守命之曰書院毀矣惟是燕居廟孔子神
位豈可俱毀吾念惟文廟複壁中可藏特以相托
毋泄乃呼燈躬奉神位付潘明年公及於難其後
燕居廟再建潘之子華言於衆乃迎而祀焉

廻安為華仲儀僕仲儀戍淮背盡無所得食安因求事乾沒日以所得歸給其主又王朋者亦華氏傭主為郡諸生悞殺其族人之僕朋竟詣官言主有事郡學去錫邑百里殺人者朋也歷訊任益力瘦死獄中又姚錄者從其主姚期綱運入都期罹法東廠捕之急因期出惟錄守舍遂自言期子縛之去道遇期亂以他語期乃逸錄至官榜掠甚酷堅言父逃久之得解歸

崇正丁丑錫邑第者七人持年晚生刺謁嚴司寇
一鶻嚴為萬歷丁丑進士年九十出見笑謂曰今
日承諸君不棄老耄他年丁丑又有後來者援例
謁諸君也胡時中進曰是時晚生輩又率諸後來
者以謁先生耳相與大笑嚴固人瑞而一時詞令
之善如此

陳大智家世素封性孝尚義識松江錢龍錫於諸
生曾造羈人舖及雲亭茶鎮橋張公殿撫諸姪成

立以己資分析授之還貧人券育族女於家失火延燒其堂詭辭曰吾室小正欲別構卒成禮嫁之巢五一震林為禮部郎康熙初朝議去四書八股制藝專用時務論策取士震林言八股可去四書五經不可去於是採其說例以經書命題

江陰縣名宦祠傾圮已久木主散失僅存三五露處祠內康熙間學博某為之修葺煥然一新學博夜夢入祠中見衣冠甚偉者四十餘人揖而告之

曰君為吾輩安設木主吾輩為君修葺宮牆閱月
有學役吳欽於祠旁鋤地忽得白金三十兩願獻
於官學博曰疇昔之夢驗矣吾敢染指此金乎手
授邑紳輦築宮牆三十餘丈不日告成學使田雯
曰此將來一段佳話也

鎮江府

漢時有金牛出於山東馳到曲阿畊村人柵斷其
道謂其地為柵口牛皆奔聚因曰奔牛又相傳萬

策湖中有銅牛人逐之走至此柵今柵口及堰皆以此名二說微異

溧陽舊多蠱毒丞相韓滉為浙江觀察欲絕其源時有僧住竹林寺每絹一疋易藥一丸中蠱毒者多獲全濟值滉女有疾浴於溫泉而愈乃捨女裝奩造浮圖於泉之右延竹林藥僧主之滉因求其方刊石於縣市以流布焉唐末石不復存而溫湯之寺不改有夏氏世傳其方藥以溫湯為名誌所

自也

原方以五月初桃皮生用二錢盤盛以麥麸炒去翅足二錢大戟生用二錢三物為末以

米泔淀為丸如棗核形凡中蠱者於食前以米泔下一丸坐靜室中忌婦人孝服猫犬見此方崇寧

間竹林住持僧智淳得之於帥府曾氏云

唐代宗時李秀卿刺湖州至維揚逢陸鴻漸羽李素熟羽名因赴郡抵揚子驛曰陸君善於茶天下聞名況南零水又殊絕二妙千載一遇乃命軍士挈瓶操舟汲南零羽執器以俟俄水至羽以杓揚之曰江則江矣非南零者既而傾諸盆至半遽止

之曰此南零者矣軍士大駭跪曰齋自南零舟蕩
覆水懼其勘挹岸水增之處士神鑒也又李德裕
在中書有親知奉使京口德裕曰還日金山下中
冷水可與汲一盞來其人舉棹日醉而忘之至石
城下方憶乃汲一瓶於江中歸獻德裕飲而嘆曰
江表水有異於頃歲矣頗似建業石城下水其人
謝過不敢隱

蕭楚材知溧陽縣時張乖崖詠作牧一日召之食

見几案有詩句云獨憾太平無一事江南閒殺老
尚書楚材為易憾字作幸字詠出見橐曰誰改我
詩者楚材曰公功高位重姦人側目之秋且天下
一統公獨憾太平何也詠感嘆曰君我一字之師
也

王正肅遂紹定間曾為平江守以師黃榦之訓書
諸紳曰士友當親而賢否不可不辨財利當遠而
會計不可不明折獄以情毋為私意所牽薦士以

才母為權要所奪當言則言不視時而退縮可去
則去不計利而遲回庶幾名節之全不愧簡冊所
載

范文正仲淹在睢陽遣子純仁往蘇州取麥五百
斛純仁時年尚少既還舟次丹陽見石曼卿問寄
此久近石曰三喪在淺土欲葬之而北歸無可與
謀者純仁以麥舟付之單騎到家文正曰東吳見
故舊乎曰曼卿為三喪未舉方滯丹陽時無郭元

振無可告者文正曰何不以麥舟與之曰已與之矣

宋末賊掠潤州城門不啓者十七日民餓死且半時有費簧者出粟施粥活人甚衆鄉人曰皆簧所祐也遂名其里曰簧祐以志其德

丹陽吉棠少時父令負販眭仲德途遇之勸令就學曰家貧須麥粥養父仲德曰麥粥我家有之攜歸與子疇同學後棠為御史過仲德家家惟一椅

讓棠坐自坐木白棠辭不敢因並坐檻上仍出麥
粥啖之時矯已列刑垣矣

北固有蜂甚巨冠色赤鳥撲之墮地羣蜂數萬結
聚不去一二日皆死楊文襄一清取而瘞之作義

蜂記

楊文襄一清在靈州人有笑其演習陣者楊謂
余誠書生不諳軍旅然以古人行必謹哨探止必
修戰備為法其敢忽諸又每諭諸將曰無事常如

有事時隄防有事常如無事時鎮靜念武侯衛公
未嘗廢營陣世無岳武穆豈可恃野戰為能耶

李重嘗授經溧陽史氏歲俸八十金史憐先生貧
私為置子錢歲暮進之重但受如約餘麾之弗顧
後舉正德間進士官至副使歸老後仍授經於溧
陽高淳間恒無以自給

丹陽蔣教諭從教性懶直有市井子驟富以金線
結為履見而惡之給曰吾欲倣其式既進履即令

童子擲諸水曰小人敢爾奢僭

王給事煜年十三遊庠時縣令與邑紳互許直指
詣學諭諸生曰為令者左為紳者右諸生俱左煜
獨徐步至右直指曰小秀才何獨異煜曰問理之
曲直不問人之多寡論人之是非不論年之大小
直指顧謂令曰此子即樹爾他日之敵矣爾其行
哉及壯讀書金山寺一日以訪友出適嚴嵩以翰
林學士入朝道金山入其館見案間文善之久待

不至留名刺函十金屬寺僧道意煜見之曰彼日後得志必為奸黨何以是汙我擲其金於江

戴從商尚質性介特嘉靖間一就試學使者鄙其苛文碎儀即棄去隱居篤學自壯至老不取人一錢不飯人一飯嘗著不取歌曰我取人一錢人取我一緡旦旦相取月月相纏是以下有血地上有刀天我今不取我念曠然爾念曠然聊以頤我年又不飯歌曰若通人飲食是隨人往來我來彼往

彼往我來歡則為狎怨則為猜歡情恒不常怨情最易久偏側一世間負債如羊狗我寧吞大冶之鎔銅決不霑烏程之清酒

呂城人陳瑤能於馬上運鐵叉數百人叢刺之莫能近嘉靖倭寇江南大府令鄉民絕橋自守而募能斬倭者一首賞錢萬瑤率其徒數十人應募乘白驃與倭戰驃上倭首纍纍也一日倭悉衆死戰倭法臨陣左手持刃挺而前右手刃纔數寸人不

虞其右也近則舒之長五六尺削鐵如肉因斷瑤
义瑤呼徒易义瑤每戰令徒載數义隨之而性貪
馘首專其功徒無與者徒憾之不應瑤度倭盛不
可敵奔逸至呂城牐先是瑤需渡而牐斷則肘下
挾驃一躍逕渡以為常是日腰懸七倭首仍挾驃
欲躍累重墜於河倭競前殺之

賀邦泰幼時其父鎬建亭水中令讀書而撤其圮
賀戲以一木支岸逕行出入甚熟後令莆田率民

擊倭馬逸馳倭壘倭逼之前臨大河廣踰丈橋毀
獨一木渡賀遂棄其騎趨而撤之倭驚以為神

崇禎初大官庖開應支物價簿帝詰內侍謂太浮
且曰炙鶩醃鯈肉酢在某肆市之錢半百耳內侍
驚愕丹陽談允謙有述事詩云潛邸曾親到市纏
民間物價每留連西華鶩炙前門酢一箸纔消半

百錢

陳都諫獻策妻程氏隨夫在京邸獻策方會議三

案於內府薄暮未歸有婦稱鄰姬求謁閤者不能
禁直入榻前泣告曰妾奉聖夫人客氏也待罪掖
廷已歷年所亦有何罪而議者將及焉妾聞卿家
大人直聲奇節知夫人亦良苦敬以黃金百鎰為
夫人壽願大人憐而赦之程謝曰夫人休矣妾以
鄙陋之質櫛不設釵袒不引帛猶自愧非分安用
此黃金為且大廷國是向兒女子嘵嘵夫人謂殿
陞中真無一男子耶聲色俱厲正論侃侃士大夫

有不逮者

張君表鳳儀子九徵登第貽書都門誠之曰入世
在自立毋輕受人恩我為諸生三十年未持一門
生之刺所見有王文成高忠憲其人乎外此無可
北面矣人謂此不特為氣骨語實名言也

華鈺以璽卿家居有富人子殺人祈鈺居間于當
道券千金却之明日倍其券又明日再倍其券鈺
曰我豈與若較此哉若罪故無生理吾分亦無居

間理郡邑試諸生鄉大夫各為所親先容鉅獨無
所謁或偽署鉅牘以進鉅廉得之不白是非但語
署牘者毋納諸生金人服其清介而仍不失長者

淮安府

王義方拜御史嘗買宅既數日忽對賓朋指庭中
青桐樹一雙曰此無酬直賓朋言樹當隨宅無別
酬例義方曰此嘉樹非他物比召宅主付之錢四

千

王義方為魏徵所知徵欲妻以夫人之姪王辭不取俄而徵薨王乃取女人問其故曰初不附宰相今感知已故也

米芾知連水軍時祀先聖極誠敬上自香帛酒醴羹醯下及牲牢灌獻靡不竭誠躬親致齋九日方敢蒞事祭時香烟直上不散結成伯牛受享四字羣覩駭異明崇禎間賀相國逢聖為應城教諭質

明丁祭親見

先聖自空中攜一芹而起與此事同

淮陽楊孝子名昊字克彰刑科給事理之父也昊早喪父哀毀甚而每強顏以慰母心事母能養志母酷愛其孫昊嘗牽率諸子抱弄母前枚指之曰某可承家某可事生業某當作官以顯門問母聞之大悅其他問安視膳瑣節不異常人而一以至誠感動有司旌其門華亭張弼為之立傳

安東濱海人房得莘猶子妻劉氏驅牛駕車運薪

於野方載數束虎忽搏劉氏牛力抵之虎棄去劉登車牛拽行十餘步虎復追至牛復抵之虎又棄去劉傷臂不能登車牛角斬於地空車就劉劉匍匐上車牛曳之行猶再三回顧抵家乃已劉得不死飼牛終身不令服輶云永樂十二年事

韋彥質斌成化時在諫垣批鱗敢諫然每自省曰假彈射以快私讐掇細緩以沽公道我所深恥後提學福建公正不可干以私而衡鑒精審曰糊名

命題我則試人填名揭案人則試吾矣庸高下其手耶凡所獎拔皆能速輩

丘志中度為山陽邑生館於郡守署郡守欲因事周之可數百金度竟辭去曰守不知丘生丘生不患貧也後官太僕卿適開府當推人有諷之者曰當軸急君甚一枉見即可得度笑曰乃有呈身都御史耶竟以忤權璫罷去

岳薦當明季棄諸生隱居勵行嘗語人曰聖賢精

蘊盡於六經四子其要歸不越大學一書凡人生平其用力當在致知其涵養當在主敬以躬行為實學以隨處體認天理為反身求已之要至今淮于學者猶欽其緒言云

桃源令蕭文蔚換邑諺以傲座右有云衙門相逼官不能為民主差使過繁民不能為身主又云貧村瀕河製一艇實有易逃之路急以刑是使之逃宜防於先時破釜鬲日煮三升實無難去之家嚴

其謀是驅之去宜防於平日

順治間徽人程元昭僦居安東齊文光之舍貰酒為業夜半見所砌花臺上有光撥土視之則白鏹一巨缸也急呼主人告之曰奈何慢藏至此盍收之齊曰非也天賜汝遜讓再三且勸程曰天與汝而可不取乎吾誓不須此非分之財爾其遄歸程後居蘇州成巨富歲一往來必有所饋遺而齊絕不受并未嘗言及前事嗚呼程固君子如齊者尤

不可及矣

孫超宗母塋在安東城北平旺河沱溝康熙間中
河口決直當其衝孫聞之奔赴見白浪澎湃如雷
松楸根已向上不數武即壘矣水深不可測而夜
昏黑泅不能至孫痛哭呼天跪水內徹夜籲龍神
不絕黎明家人肩柴負木接踵而至下椿埽以救
危急則見塋前昨夕之深不可測者已橫起沙壠
溜水兩分去如燕尾見塋止塌去一角而四週皆

成平陸

安東有朱母蘇氏節孝祠。朱以傑其裔孫也。康熙間火災自城外延燒城內，不啻千餘家。而節孝祠迫於烈焰，以傑奔救之。見祠內平地出火燄起數尺，勢不可保，乃呼天痛哭，懷神主期以身殉。哭未已，忽反風，祠火盡滅。惟焦門外旗杆二株，廟貌一無所損。人以為誠孝所感云。

揚州府

廣陵高爽博學多才齊永明中舉孝廉先是劉蒨為晉陵令爽詣蒨不相接甚銜之俄而爽伐蒨為令蒨迎贈甚厚爽受饋答書人問其故答曰彼自餉晉陵令耳何關爽事

司徒杜衍天禧間知揚州嘗召賓幕閒語我致政之後必買一小駟八九千者飽食訖跨之著一粗布襯衫入市看盤鈴傀儡足矣杜深志豈在傀儡蓋居高位欲自汚退老耳後致仕果行前志

海寧人王興公伯起少年時曾一舉進士輒嘆曰士不自重與千百人旅進坐軒廡下獻小藝規含有司可恥也遂棄去閉門力學嘉平間被薦不起

孫叔靜磬本錢塘人隨父徙江都徵時與蔡京善常言蔡子貴人但才勝德恐貽天下憂及為屯田員外郎京謂之曰我若用於天子願助我磬曰公誠謹守祖宗之法以正論輔人主示節儉以先百吏而絕口不言兵天下幸其磬何為者後竟以忤蔡罷

揚州產芍藥佳者不減姚黃魏紫蔡京知州日作
萬花會其後歲歲循習人頗病之元祐間蘇文忠
軾來知州正遇花時吏白舊例軾判罷之書報王
定國云花會檢舊案用花千萬朵吏緣為奸乃揚
州大害已罷之矣雖殺風景免造業也

蘇文忠軾知揚州夢行山林間一虎來噬窘甚有
紫衣道士揮袖障公叱虎使去明日道士投謁曰
夜出不至驚否蘇叱曰鼠子乃敢爾正欲杖汝脊

汝謂我不知豎子夜來術耶道士惶怖而退

蔣穎叔之奇為江淮發運使才智有餘人莫能欺
嘗於所居公署前置一占風旗使人候之置籍焉
令諸漕綱日程亦各記風之便逆蓋雷雨雪雹霧
露或有不均而風則無頓殊者每運至取其日程
歷以合之責其稽緩者綱吏畏服

熙寧中高麗入貢所經州縣悉索地圖所至皆造送
山川道路形勢險易無不備載至揚州牒州取地圖

是時丞相陳升之判揚州給使者欲備見兩浙所供圖倣其規制造送及圖至都聚而焚之具以事聞

宋祖自平江南詔以兵器盡納揚州不得支動號曰禁庫方臘作亂童貫出征許於遂州軍選練兵仗既開禁庫兩將士望見所貯弓挺直曰此良弓也因出試之宛然如新計開寶至宣和一百五年而膠漆不脫可謂異矣靖康末東南起勤王之師帥臣翁彥國令揚州作院造神臂弓限一月成

皆不可用識者以為國初之弓限一年成而今成
於旬日之間宜乎美惡之相絕也

張舜文汝明徽宗時知岳州屬邑得古編鐘求上
獻張曰天子命我以千里懼不能仰承德意敢越
職以倖賞乎

朱光信恕樵薪於草堰場以養母每從王良齋聽
講有禮之者曰我以數十金貸汝別尋生計庶免
作苦且可日夕從吾輩遊也朱得金恚曰子非愛

我也我自此憧憧然經營念起斷送一生矣遂擲
還之學使者召之不往以事役之短衣徒跣而入
儲文懿巖字靜夫泰州人卒於南都後三年歸柩海
陵攢於墓舍將葬啓視棺上生黝墨成繪畫文具畫
家皴染之法前則奇石枯松旁出二篠莖葉咸備左
則梅株夭矯稍著數花右如左而樹枝差短其文深
入木理四方來觀詫為神異顧尚書璘為作靈徵記
嘉靖初揚有司訓徐覲者於啓聖祠旁縱奴射鶴

一日鶴銜火焚祠有鶴數百盤旋烈焰之上若快心者徐坐焚祠去官奴亦瘡

楊實夫果嘉靖間官至侍郎清介恬退嘗語人曰吾生平無所長惟不識瑾寧彬三人差自慰耳李文定春芳及第臚傳前一日在寓邸與客弈或密以所擬甲乙報李返坐自如置帖碁枰下終局無幾微見顏色客詰之徐以帖示客曰拙卷亦預進呈之列耳衆以此多其度廷對前數日夢紅帛

纏身不得脫及臚傳世宗見其名大喜曰桃李當
春日正芳妍之時以硃筆遶春芳二字圈之居政
府時考官以典南闈試來別袖出預擬試題呈正
李置篋中而已將揭曉夫人問兒輩知可中否曰
題難焉得中夫人驚何以預知因語其故夫人問
寄兒輩否曰人以心腹待我故先期見示語兒輩
非彼所望於我也從篋取出火之

李碧海思誠夫人于氏極賢明當思誠為宗伯加

宮保時夫人家居有人言公行入閣者夫人正色
曰宰相可為而於閩宦得志之時則可為而不可
為也

曾銑有膽畧長於用兵其撫邊時當除夜猝命諸
將出塞上時無警諸將置酒度歲不欲行賂鉉卒
求緩於銑妾妾啓銑銑斬卒以徇諸將不得已丙
夜被甲行果遇寇擊敗之翼日入賀畢問何以知
有警也銑笑曰見烏鵲非時噪以故知之皆大服

盧守常倅陳州日畜一鶴甚馴一創死一哀鳴不食盧勉飼之乃就食一旦鳴繞盧側盧曰爾欲去耶有天可飛有林可棲不爾羈也鶴振翮雲際數四回翔乃去後盧老病無子歸休黃浦溪上晚秋蕭瑟曳杖林間忽有鶴盤空聲鳴淒斷盧仰祝曰若非我陳州侶耶果爾當下鶴竟投入懷中以喙牽衣旋舞不釋盧撫之泣曰我老無嗣形影相弔爾幸留此當如孤山逋老共此殘年遂引之歸盧

歿鶴亦不食死家人瘞之墓在丁堰

宗臣為閩督學卒於官僚屬生儒咸赴弔於靈凡上得遺詩三首超脫塵塗以故相傳戶蛻云

劉靜之永澄萬歷間為順天教授北方稱為淮南夫子嘗曰謙謙自牧由由與偕在醜不爭臨財無苟此居鄉之利也耳習瑣尾之談目習徵逐之行以不分黑白為渾融以不悖時情為忠厚此居鄉之害也夫惡人不可為矣庸人又豈可為乎惡人

不當交矣庸人又豈足交乎

南江寺僧羅得一雁籠置窓外秋夜聞月下有雁聲與龍雁相鳴答俄而撲拉簷下僧亟起視則二雁交頸俱斃又婁生以矰弋為業方捕隻雁入籠而飛雁盤空叫聲甚苦頃即自投而下籠中者伸脰就之交結死婁為感動瘞之叢薄間破矰斷繳改業焉

劉西郭清師事林東城司訓浮梁教嚴而氣和或

從而問著述則曰帖括是尊最悞後進問學術則
曰道寓諸庸目前皆是

謝家店民家有雙燕巢於梁既乳四燕其雌忽為
鷺鳥所搏俄有羣燕挾一雌來留與為偶閱一二
日四雛悉斃主人怪之啓視喉間皆蒼耳子蓋雌
妬殺之也此與張邦基墨莊漫錄所載廣陵牛氏
燕事正同又皆出於揚土亦大異事

劉翼齋希文為諸生時嘗以朔望謁監司時有某

生怙勢豪橫出訟牒理債於公庭衆雖不與其事
然皆附和長跪希文獨挺身離班次竦立監司詰
之對曰所言公何敢不伏謁若結黨徇私此膝寧
輕屈耶監司大加器重

東廂民陳穀死有所愛犬常伏柩旁不去既葬犬
時時往宿其冢數日乃一歸求食家人殊不知也
穀子相為諸生以時掃墓見犬方專冢臥為之加

慟

韓樂吾貞以陶瓦為業從朱信學久之有得縣令
嘉之遺米二石金一鎰貞受米返金謝曰某寃人
無能補於左右但與貞居者幸無訟牒煩公府此
所以報明府也每遇會講有談世事者輒大噪曰
光陰有幾乃作此閒談耶或尋章摘句則又噪曰
舍却當下不理會搬弄陳言此豈學究講肆耶在
座莫不警省

咸寧人倪璜寓居廣陵母劉病齋沐祈天七夜不

寐一日方沐浴盆水忽冰成奇花扶疎三本幹葉俱備母病遂愈人咸嗟異為孝徵

李維嶷長敷宗伯公子與姪清同舉於鄉鄉人噴噴稱羨長敷顧清慨然曰吾不喜而憂也夫盛滿道家所忌且積德以致福今無乃福溢於德乎故可憂也

夏心尼宗孔髻歲為諸生篤行嗜學嘗銘座右曰五倫之外無事業六經之外無文章年近百歲高

郵守三晉之賓筵云

方立禮繼母愛已出子遇立禮不慈鞭撻至酷立禮受之無怨言江都人莫不稱其孝其父卒母閉之空室中不予以食者三日有犬銜餅自竇中入與之得不死母意其已斃啓門見猶生遂以為神暴亦漸已

陳恕先以忠江都諸生敦實學持身以敬為主每曰敬則寡慾可以成仁敬則心虛可以益智敬則

氣聚可以生勇三達德皆由敬出也

妖人朱方旦妄言禍福走謁者如驚汪蛟門懋麟
為辨道論闢之謂國家幸太平無事得此輩以資
談諧玩弄足矣今傳會者崇奉太過或謂孔氏復
生或謂大禹再見甚謂移檄玉皇則祈雨立應不
惟上侮聖人亦且獲罪天地一旦朝廷震怒加以
妖言惑衆之罪吾不知朱某安所逃死時孝感熊
賜履掌翰林佩其言枉顧訪之與定交汪後罷官

歸構十二研齋於平山堂側吟嘯以老云

徐州府

漢高祖父太上皇前史不載其名後漢章帝紀祠太上皇於萬年注名煓一名執嘉高后紀載高祖母曰昭靈后

唐王智興為徐州節度一日諸從事會飲賦詩智興至從事即屏去翰墨智興言適間作詩何獨見某而罷復以箋陳席上小吏置箋智興前智興引

毫立成曰三十年前老健兒剛被郎官遣作詩江
南花柳從君詠塞北烟塵獨我知四座驚嘆監軍
謂張祜曰觀茲盛事豈得無言祜乃獻詩曰十年
受命鎮方隅孝節忠規兩有餘誰信將壇佳政外

李陵章句右軍書

蕭縣劉伯龍家有清節宋元嘉中為武陵太守歸
貧甚將營什一之方忽見一鬼在旁撫掌大笑伯
龍嘆曰貧窮固有命乃復為鬼所揶揄耶遂止

晁文元迴在翰林以文章德行為真宗所優異稱
為君子長者天禧初因草詔命坐賜茶既退已昏
夕上顧左右取燭與學士中使就御前取燭為導
出內門傳付從史又嘗宴宜春殿內出牡丹百餘
盤千葉者纔十餘朵賜親王宰臣上顧迴及錢文
禧維演各賜一朵凡賜禁中名花故事惟親王宰
臣中使為之插花餘皆自戴上獨令內侍為迴戴
花觀者禁之

李若谷未第時與韓億為友俱貧同試京師每出謁更迭為僕若谷先登第授許州長社縣簿赴官自控妻驢億為負箱將至長社三十里謂億曰恐縣吏來須別因取箱中錢六百以其半遺億一榦一席亦割分之相持大哭後億亦登第皆仕至參知政事

天聖間新進士謁李子淵若谷求教若谷曰某自守官來常持四字曰勤謹和緩一後生應聲曰勤

謹和既聞命矣緩之一字某所未聞若谷正色曰
何嘗教賢緩不及事來且道世間何事不因忙中
錯了

黃瑞禾慕明經能詩嘗揭於壁曰十分貧也還栽
竹四壁蕭然不賣琴其高致可挹

王封麓國輔丁公里人仕為鄢陵令性剛正嘗有
司李欲取其公署一牀者國輔曰此公家物非有
司所能私予

趙子雖時若沛貢生性仁厚家畜一驢聞鄰人生
子謂妻曰彼年三十始有兒脫驢鳴驚之是我過
也遂賣之

崔眉山字曰喟嘗為聖府典籍年六十尚無子有
妾數年不孕妻復為購一婢崔惻然曰子之有無
命也安用多玷以滋子罪擇配遣之未幾而前所
納妾連舉二子

徐州有義虎橋相傳有商迷道悞墮虎穴謂必死

乃虎熟視不加噬晝則出取物食之夜歸若為之
護者月餘商稍諳虎性謂之曰吾失道至此幸君
惠我我久客外家有父母妻子思欲一見仗君力
能置我大道中幸甚虎即伏地搖尾商喻意騎其
背虎躍出置諸道旁顧而悲跳分去後數載商偶
經其地見獵者縛一生虎將獻之官視之乃前虎
也虎見商回睨不捨商亦感泣與衆具道前事亟
出重貲贖之衆義其所為釋縛縱深山中後人於

其地為橋以表焉

邳州有慈母樹順治間州民劉清源幼失生母嫡母沈氏撫養之食必先嘗寢必同臥恩踰已出其家祖墓有樹枯十三年矣一夕復生枝葉更茂前時人以為沈德所感故以號樹云

順治間宿遷知縣金華鄭應兆奉臺檄令以逋賦紳士名列上候處分獨不肯具報或謂之曰子寧不為官計乎應兆曰我安忍以數百人身名博我

一官哉竟以此去

諸生王來彝懷遠讀書教子每云家居能教一子弟心術正即流德無窮也當諸子弟會食必諄諄以天理二字相戒勉

太倉州

龔熙仲明之以孝行節誼著於海濱紹興間舉鄉貢年已六十或勸少為詐匿以避老龔笑曰吾生平不欺豈以始進易心乎

嘉定王彝自號媯蜋子學有淵源文甚高潔時楊
鐵崖維貞以文雄東南傾動一世彝獨作文妖一
篇詆之

練達者子寧從父知嘉定縣會族誅部民郭元宗
曾被盜誣達廉其冤出之至是詣達欲與俱亡達
以懷姪妾黃氏屬之而與妻赴海死郭迎黃氏處
別室生男謹護之念其父為邑侯而嘉定號練川
乃托姓侯名之曰居練既而詔除諸臣家屬罪黃

囑居練勿自明以是無知者黃守節九十三歲卒

按縣志及縣令題名并江西通志俱無練達姓名
因練氏已削籍不敢載耳乃其家藏有宗譜足徵

世傳不
誣也

陸安甫伸未第時州大夫請修州志陸謝曰志者
一方文獻史稱虞世南豫修書虞荔虞寄得佳傳
至今譬之先子州人子何執筆後登第竟以觸璫
怒死

明初嘉定縣吏某一鄰人以訟在縣白吏求私直

之吏曰今郡縣官皆公廉奉法吾曹革心疇敢出入文牘汝事直第公理之決無枉鄰人如教果獲伸感吏餽粟二石吏驚却之不得曰吾以鄉曲之故為君受一斛後因假歸遂以原粟奉鄰母曰此若兒所寄今以還母此吏殊可風也

真如有姚生者素險賊嘗構怨於陸某陸充糧長乘馬自本都夜歸姚偵其無備操刀伏中途橋下馬至橋躡躅不進陸鞭之纔進遂為姚所殺月暗

幽寂無知者馬逸歸向陸妻驚嘶不已若有所訴
妻知其夫必死非命持燈隨馬去至橋下獲尸焉
妻哀哭告馬曰夫死不得賊何以雪冤馬即前導
至姚門鼓足蹴不休姚出則直前噭之妻於是執
以赴官姚竟抵法

大場鎮農家婦舉止修整嫣然閨中秀也夫貧蠢
婦毀裝佐之日與村姑里嫗輩習田間勞苦無難
色間有親戚憐其貌者執手作慰藉語則歛容謝

曰兒樂此不疲且非是無以奉我尊嫜也如是者十餘年有子矣以竭作故病瘵死死前一日忽向其夫索筆硯夫不識一丁字者詣鄰家假至婦見之嘆曰謝此緣久何期今日遂成長別耶起題一絕云當年二八過君家刺繡無心只枲麻今日對君無別語免教兒女衣蘆花語意淒婉其生平曉義命雅自韜晦恥炫鬻尤卓卓可傳云

黃蘊生淳耀釋褐後寄弟書曰吾廷試傳臚時見

鼎甲先上人皆噴噴稱羨吾此時嘆息無限夫天
地間自有為數千年一人數百年一人者今人必
不肯為數千百年之一人而必欲為三年之一人
何也

崇明有吳姓老人者康熙間年九十九歲其妻亦
九十七歲老人少壯時嗜酒好賭博有四子盡鬻
為人奴四子咸能自立各贖身娶婦列肆同居以
養父母四子始擬每月輪供諸婦曰翁姑老矣必

三月後奉甘旨太疎復擬每供各一日諸婦又曰必三日後奉甘旨亦疎於是每日序進一餐越五日則又共設於中堂父母南向坐諸子孫婦以男女分東西行稱觴獻壽又置一榭四子日納錢其中隨老人所用老人好博不已四子常密持錢送博家囑令佯輸老人常勝持錢歸忻忻如也長子於時年七十七餘皆白頭孫曾二十餘人總兵劉兆旌其門曰百齡夫婦齊眉五世兒孫遼膝嘉定

令陸隴其記其事

海州

州有廟祀牛今遺址尚在曩有農耕於野夜宿隴間虎來欲啖農牛在側護之觸虎農覺不知也反鞭牛之駭躍為驚已又熟睡及明起視牛死審之知牛為虎傷力竭而死也方悟已之活為牛救云故報以廟祀為文以祭曰牛為我役我為牛主我牛幼時親經調理天或寒歟置於燠地時或饑歟

供以草具旦摩暮撫已去復視頭角崢嶸供我農
事幸爾之生嗟爾之死既非喘月又無釁隙猛虎
出嵎欲啖其主非爾在旁我其死矣幸爾在旁盡
力以抵及旦視之虎敗爾死嗚呼蠹獸尚知德可
以人不如山陰立廟堂祭祀增歎嘘

贛榆楊秀才妻劉氏孀居宣和間朝廷收復中原
科增郡縣免夫錢劉氏以十萬緡代下戶之輸所
積空矣而且日視之錢復滿室每緡首有麻青二

字人咸駭異或云青州有麻十萬家豈非神運至此耶因於青州踪跡果有麻氏失錢劉請歸之麻不受乃悉散施之後家益富

通州

紹興中沈與求聞劉豫於京東造舟因言海道當防如通泰料角石港水勢湍急海舟至此必覓沙上水手方能掉運舟航轉入倘於此處為備盡拘水手無為賊得則賊自不能衝突矣

司寇陳敬甫堯先後持憲以疾惡聞然嘗奏記徐文貞階曰天之生大賢大不肖僅僅耳大抵中材為多惟彼中材有志而未練則見欺有才而暴施則見忌此兩者苟器使之近於賢苛責之近於不肖愚意均當姑置而觀其後乃可階甚善之通人至今稱陳廉介而不失長者

阜城東湯家灣有余氏族居隆萬間里中貴人用青烏家言售余氏一善地為墓既售則盡發其家

旁一家則余之婆婦所葬夫也婆有姑年老念家
必不免一日市牲醴盡邀余族奉其姑上座而拜
且遍拜族人進三爵乃出匕首置几上曰新婦奉
姑本欲終其天年不謂今日禍及夫骨何用生為
今與姑長別俟貴人來以頸血濺之矣自是挾匕
首共起居貴人駭不敢奪今一家獨存

彭大同世精胡氏春秋在通推為專門任叙州司
理時有楊氏子修怨於仇家乘父老病扶至河壩

而挑敵之遂致死訊者以仇家論抵大同捉筆大
書曰春秋無將將則必誅其欲甘心於仇因以忍
視其父河壩之死誰則挾之坐子如律直指署其
判曰推官讀春秋可謂見諸行事矣

崔聲遠鑄為黃戶長掌鄉稅嘗以輸稅金五百兩
付鎔工工以無券欺而負焉鑄竟破產償之官時
三原王恕知揚州廉其狀謂鑄訟鎔工當為追理
鑄對曰鑄廢產是已破一家矣奈何復破一家恕

嘆曰仁人之言也鎔工聞而慚感圖償

邵潛自號五岳外臣傲僻不諧俗好嫚罵人多惡之及與李維楨鄒迪光黃汝亨陳繼儒諸前輩遊所著友誼錄循吏傳印史諸書多可傳者年五十無子復娶妻妻嫌其貧老棄去一婢又為勢豪所奪遂孑身棲如臯城西門外年八十矣康熙間新城王尚書士貞過臯訪之茆屋三間黝黑如漆邵筋骨如鐵白髮鬢鬢被領雙眸炯然具果毅留王

飲尚能進數觴且與修禊冒氏洗鉢池賦詩陳檢
討維崧曰古今文人多窮然未有如邵先生者聽
其言愴然如劉孝標自序也



江南通志卷一百九十五